

nemnaliíumi beni. ueíonna incorobouido  
naíanmanbe gniíou apeni temeuelle íexsetesi  
sueregeniatu o quprinnopetamebissi íeteta.  
miíi íegumi. suante ueíommi petamassi papissone  
suirexetesi íegiinna anmanbe íeguisini  
siaxsiou. beíiassunebiti moi upiíummiateri  
xsi índore core. nuana íegumisini · beíiassusete  
sue cluio u sedagisamo cele uiro íonoue  
íiobiíe beíiassusete rega íexstumisendi  
me · setingi papissonebeíiassusetemetingise  
tingibeíiassuseteregarise íexstumisendi

